

# 卷五

書名 漢蔡中郎集六卷 嘉靖二十七年序任城楊賢刊本  
 撰者 漢 蔡邕 撰，明 喬世寧，明 俞憲 校訂  
 卷 卷五  
 內容分類 集-別集 漢魏六朝 漢  
 索書號 倉石40022  
 編號 4002100

[彩色首頁1](#)

[東洋文化研究所漢籍目錄 編號: 4002100](#)

[東洋文化研究所漢籍目錄所藏漢籍善本全文影像資料庫 索書號: 倉石40022](#)

[漢籍善本全文影像資料庫文本 漢蔡中郎集六卷 嘉靖二十七年序任城楊賢刊本](#)

版權所有: [東京大學](#), [東洋文化研究所](#)  
[使用上的注意事項](#)

漢蔡中郎集卷之一

明 役 羽 喬 世 寧 景 叔 無 錫 俞 憲 汝 成 校 訂 任

城 楊 賢 子 庸 梓 行

獨 斷

天子正號曰皇帝自稱曰朕臣民稱之曰陛下其言  
 制詔史官記事曰上車馬衣服器械百物曰乘輿所  
 行在所所居曰禁中後曰省中印曰璽所至曰幸  
 曰御其命令一曰策書二曰制書三曰詔書四曰

漢蔡中郎集卷之四終

漢蔡中郎集卷之五

明校栩喬世寧景叔無錫俞憲汝成校訂任  
城楊賢子庸梓行

陳太丘碑

先生諱寔字仲弓潁川許昌人也含元精之稹應期運  
之數兼資九德總脩百行於鄉黨則恂恂焉斌斌焉善  
誘善導仁而愛人使夫少長咸安懷之其爲道也用行  
舍藏進退可度不徼訐以干時不遷怒以臨下四爲郡  
功曹五辟豫州六辟三府再辟大將軍宰聞喜半歲太



丘一年德務中庸教敦不肅政以禮成化行有讎會遭  
黨事禁錮二十年樂天知命澹然自逸交不諂上愛不  
黷下見幾而作不俟終日及文書赦宥時年已七十遂  
隱丘山懸車告老四門備禮閑心靜居大將軍何公司  
徒袁公前後招辟使人曉諭云欲特表便可入踐常伯  
超補三事佩紆金紫光國垂勳先生曰絕望已久飾巾  
待期而已皆遂不至弘農楊公東海陳公每在衮職群  
僚賀之皆舉手曰潁川陳君命世絕倫大位未躋慙於  
文仲竊位之負故時人高其德重於公相之位也年八

有三年平三年八月丙子遭疾而終臨沒顧命留葬  
所卒時服素棺槨財周襯喪事唯約用過乎儉群公百  
僚莫不咨嗟巖藪知名失聲揮涕大將軍吊祠錫以嘉  
謚曰徵士陳君稟岳瀆之精苞靈曜之純天不憖遺一  
老俾屏我王梁崩哲萎于時靡憲縉紳儒林論德謀績  
謚曰文範先生傳曰郁郁乎文哉書曰洪範九疇彝倫  
攸叙文爲德表範爲士則存誨沒號不亦宜乎三公遣  
令史祭以中牢刺史敬吊太守南陽曹府君命官作誄  
曰赫矣陳君命世是生含光醇德爲士作程資始旣正

守終又令奉禮而沒休矣清聲遣官屬掾吏前後赴會  
刊石作銘府丞與比縣會葬荀慈明韓元長等五百餘  
人總麻設位哀以送之遠近會葬千人以上河南尹种  
府君臨郡追嘆功德述錄高行以爲遠近鮮能及之重  
部大掾以成斯銘可謂存榮沒哀死而不朽者也乃作  
銘曰嶽嶽崇岳吐符降神於皇先生抱寶懷珍如何昊  
穹旣喪斯文微言圯絕來者曷聞交交黃鳥爰集于棘  
命不可贖哀何有極

陳太丘廟碑銘

維中平五年春三月癸未豫州刺史典以褒功述德政  
之大經是以作謚封墓興於周禮衛鼎晉銘其昭有實  
故太丘長潁川許昌陳寔字仲弓含聖哲之清和盡人  
才之上美光明配於日月廣大資乎天地辟四府宰三  
城神化著於民物形表圖於丹青巍巍乎其不可尚也  
洋洋乎其不可測也儉約遠時懸車致仕微辟交至遂  
不屑就春秋八十有三寢疾而終大將軍賜謚群后建  
碑國人立廟先生有二子季方元方皆命世希有繼期  
特立季方盛年早亡亦圖容加謚元方在喪毀瘁消形



嘔血純孝過哀率禮不越于時嘉異畫像郡國欽盛德  
之休明懿鍾鼎之碩義乃樹碑鐫石垂世寵光詞曰於  
皇先生冠耀八荒闡德之宇探道之綱繼期立表以訓  
四方惟亮天工群生之望高明允實有馥其芳載德奕  
世休有烈光欽慕在人舊有憲章過牧斯州庶奉清塵  
棄予而邁靡瞻靡聞嗟我懷矣曷所咨詢告哀金石式  
昭其勤

文範先生陳仲弓銘

君諱寔字仲弓潁川許人也其先出自有虞氏中葉當

周之盛德有媯滿者武王配以太姬而封諸大吳之墟  
是爲陳胡公春秋之末失其爵土遂以國氏焉世篤懿  
德令聞不顯君膺皇靈之清和受明哲之上姿憑先民  
之遐迹秉玄妙之淑行投足而襲其軌施舍而合其量  
夫其仁愛溫柔足以孕育群生廣大寬裕足以包覆無  
方剛毅強固足以威暴矯邪正身體化足以陶冶世心  
先生有四德者故言斯可象靜斯可効是以邦之子弟  
遐方後生莫不同情瞻仰由其模範從其趣尚矣狼斯  
和爭訟化讓雖嚴威猛政迫以刑戮未若先生潛導之

速也其立朝事上也恭順貞厲含章直方無顯諫以彰  
直不割高而引長常幹州郡腹心之任義則進之以達  
道否則退之以光操然後德立名宣蓋于當世辟司徒  
府納規陳謀匡弼三事人用昭明台階允寧遷聞喜長  
清風暢於所漸儉節溢於監司郡政有錯爭之不從即  
解綬去復辟太尉府遷太丘長民之治情欽愆反於端  
懿者猶草木之偃於翔風百卉之挺於春陽也以所執  
不協所屬色斯舉矣不俟終日辟大將軍府道之行廢  
有分於命乃罹密網以就禁錮潛伏不試十有八年大

也蠲除舉賢良方正大將軍司徒並辟君曰七十有賢  
車之禮况我過諸遂不應其命容止法度老而彌壯凡  
所履行事類博審不可勝數略舉首目其實錄記在乎  
其傳春秋八十有三中平三年八月丙子卒大將軍三  
公使御屬往吊祠會葬作議謚曰文範先生刺史太守  
樹碑頌德許令以下至於國人立廟舊邑四時蒸嘗歎  
哀承祀其如祖禰先生存獲重稱亡歆血食修行於已  
得斯於人固上世之所罕有前哲之所不過也孤嗣紀  
銜恤在疚敢錄言行終始所守乃有三友生咨度禮



則咸曰君化道神速行于有國法施于民祀典所宗鄉人之祠非此遺孤所得專也昔者先生甚樂茲土築室講誨精靈所寧紀順奉雅意遂定兆域宜有銘勒表墳墓俾後生之歌誄德音者知丘封之存斯也乃作銘曰於熙文考天授弘造淵玄其深巍我其高剛而無虐柔而不撓誕鋪模憲示世作教君之誨矣民胥効矣道行斯進廢乃斯止鮮我顯泰既多幽否舍榮取辱涅而不緇德之休明賤不爲耻超邈其猷莫與方軌

郭有道林宗碑

先生名恭字林宗太原界休人也其先出自有周王季之穆有號叔者實有懿德文王咨焉建國命氏或謂之郭即其後也先生誕膺天衷聰睿明哲孝友溫恭仁篤柔惠夫其器量弘深姿度廣大浩浩焉汪汪焉奧乎不可測已若乃砥節勵行直道正辭貞固足以幹事隱括足以矯時遂考覽六籍探綜圖緯周流華夏游集帝學收文武之將墜拯微言之未絕于時纓綬之徒紳佩之士望形表而景附聆嘉聲而響和者猶百川之歸巨海鱗介之宗龜龍也時乃潛隱衡門收朋勤誨童蒙賴焉

用祛其蔽州郡聞德虛已備禮莫之能致群公休之遂  
辟司徒掾又舉有道皆以疾辭將蹈洪崖之遐跡紹巢  
由之絕軌翔區外以舒翼超天衢以高峙稟命不融享  
年四十有三以建寧二年正月乙亥卒凡我四方同好  
之人未懷哀悼靡所置念乃相與推先生之德以圖不  
朽之事僉以爲先民既沒而德音猶存者亦賴之於紀  
述也今其如何而闕斯禮於是建碑表墓昭銘景行俾  
芳烈奮乎百世令聞顯于無窮其詞曰於休先生明德  
通玄純懿淑靈受之自天崇壯幽濬如山如淵禮樂是

悅詩書是敦匪惟撫華乃尋厥根宮牆重仞允得其門  
懿乎其純確乎其操洋洋搢紳言觀其高棲遲必仁善  
誘能教赫赫三事幾行其招委辭召貢保此清妙降年  
不永民斯悲悼爰勒茲銘摛其光耀嗟爾來世是則是  
效

光武濟陽宮碑

惟漢再受命曰世祖光武皇帝考南頓君初爲濟陽令  
濟陽有武帝行過宮常封閉帝將生考以令舍下濕開  
宮後殿居之建平元年十二月甲子夜帝生時有赤光



室中皆明使卜者王長卜之長曰此善事不可言歲有  
嘉禾一莖生九穗長於凡禾因爲尊諱王室中微哀平  
短祚姦臣王莽偷有神器十有八年罪成惡熟天人致  
誅帝乃龍見白水淵躍昆上破前隊之衆彌二公之師  
拔兵略地經營河朔戮力成功翼戴更始又不即命帝  
位闕焉於是群公諸將據河洛之文叶符瑞之珍僉曰  
曆數在帝踐祚允宜乃以建武元年六月乙未即位鄗  
縣之陽九域之陌祀漢配天不失舊物享國三十有六  
年方內又安蠻夷率服巡狩太山禪梁父皇代之遐迹

帝者之上儀罔不畢舉道德餘慶延于無窮先民有言  
樂樂其所自生而禮不忘其本是以虞稱媯汭姬美周  
原皇天乃眷神宮實始于此厥跡邈哉所謂神麗顯融  
越不可尚小臣河南尹鞏瑋先祖銀艾封侯歷世卿尹  
受漢厚恩瑋以商箕餘烈郡舉孝廉爲大官承來在濟  
陽願見神宮追惟桑梓褒述之義用敢作頌頌曰赫矣  
炎光爰耀其輝篤生聖皇二漢之微稽度乾則誕育靈  
姿黃孽作慝篡握天機帝赫斯怒爰整其師應期潛見  
扶陽而飛禍亂克定群凶殄夷匡復帝載萬國以綏巡

于四岳展義省方登封降禪升于中皇爰茲初基天命  
孔彰子子孫孫保之無疆

太尉橋公廟碑

橋氏之先出自黃帝帝葬于橋山子孫咸以爲氏漢興  
世以禮樂爲業高祖諱仁位至大鴻臚列名於儒林相  
侍中廣川相考東萊太守公稟性貞純幼有弘姿剛而  
不虐威而不猛聞仁必行睹義斯居文以典術守以繼  
固弱冠從政當官而行刺史周公辟舉從事所部二千  
石受取有驗公糾發賊罪致之於理時有椒房桂戚之

託周公累息公不爲之動史魚之勁直山甫之不阿於  
是始形舉孝廉除郎中洛陽左尉特進潁王梁不疑爲  
河南尹當事以對是時畏其權寵而爲屈辱者多矣公  
不折節解印綬去辟司徒舉高第補侍御史以詔書考  
司隸校尉趙邠事廷尉郭貞私與公書非接使御命之  
儀公封書以聞貞以文章得用鬼薪公離司寇辟大將  
軍梁公墓府屢以救正于其隆指將軍嘉之無言不讎  
又以高第補侍御史在職旬月羗戎匪茹震驚隴漢西  
府舉公拜涼州刺史威名克宣凶虜革心清風席卷至



則無事車師後部阿羅多卑君相與爭國兵作亂公遣  
從事牛稱何傳舉輕騎奉辭責罪收阿羅多卑君繫燉  
煌正處以聞阿羅多爲王卑君侯稱以奉使副指除侯  
部不動干戈揮鞭而定西域之事人以爲美談又值饑  
荒諸郡飢餒公開倉廩以貸救其命主者以舊典宜先  
請公曰若先請民已死廩訖乃上之詔報曰邊穀不得  
妄出玄擅出於是玄有汲黯憂民之心後不以爲常公  
達於事情剖斷不疑皆此類也遷齊相視民如保赤子  
討惡若赴水火刑明賞遂民知勸懼臨淄令賂財賊多

罪止正受鞠就刑沒齒無怨竟以不先請免官徵拜上  
谷太守民有父子俱行凶人人惡言當道曉之不止其  
子殺之而捕得公以其見悔辨直不舉文書以遇赦令  
蕃縣有帝舜廟以故事齊祠戶曹史張機有懲罰貨祠  
巫自託以舜命約公云不得譴公覺其奸態收考首伏  
即日伏辜遷漢陽太守上邽令皇甫禎賊罪明審收考  
髡鉗死于冀市後以病去徵拜議郎司徒長史循王悝  
桓帝同產以懷逆謀黜封瘿陶王以公長於襟帶拜鉅  
鹿太守悝畏怖明憲檢于靜息自將作大匠徵未到而

章謗先入故轉拜議郎遂用免官徵度遼將軍遷河南  
尹少府大鴻臚司徒司空託病而去悉引衆災雖非已  
負公皆以自劾遜位歲餘拜尚書令時河間相蓋升以  
朝廷在藩國時鄰近舊恩歷河南太守太中大夫在郡  
受取數億以上創毒深刻公表升會放狼籍不顧天網  
損辱國家爲上招怨當肆市朝以謝兆民幸遇贖令罪  
除惡在可免升官禁錮終身沒入財賂非法之物以充  
帑藏懲戒群下連表上不納而升遷爲侍中公稱病辭  
徙拜光祿大夫復拜太尉如前遜位復拜少府病不就

職拜太中大夫凡所獲祿皆公府所特表選臨難受位  
自九列之後乃以不貶公紀綱張弛勇決不回見是非  
而作速於察機巧燕居從容中中天天和樂寬裕愛士  
親仁凡見公容貌聞公聲音莫不熙怡悅懌思樂模則  
來者忘歸去者願還雅性謙克不吝於利欲雖衆子群  
孫並在仕次曾無順媚一言之求身沒之日無獲大位  
在百里者莫得好縣比方公孫未有若茲者也初公爲  
舍於舊里第卒推與其孤至於即世柩殯無所清儉仁  
與之効於斯爲著巍巍乎若德允世之表儀也已公諱



玄字公祖少辟孝廉辟司徒大將軍府爲侍御史牧一  
州典五郡出將邊營入掌機密歷三卿同三司享年七  
十五光和七年夏五月甲寅以太中大夫薨于京師朝  
廷所以吊贈如前傳之儀九月乙酉葬於其所三孤故  
臣門人相與述公言行咨度禮制文德銘于三鼎武功  
勤於鈺鉞官簿次第事之實錄書于碑陰俾爾昆裔永  
有仰於碑陰云光光烈考伊漢元公克明克哲實獻實  
聰知淵之浚如岳之嵩威壯虓虎文繁雕龍撫柔彊垂  
戎狄率從敷教中夏五典攸通帝謂我后朕嘉君功命  
德作憲萬邦

### 太尉橋公碑頌

公諱玄字公祖梁國睢陽人也大鴻臚之曾孫廣州相  
之孫東萊太守之元子也膺受純性誕有特表岐嶷而  
超等總角而逸群至于初紳高明卓異爲衆傑雄其性  
疾華尚朴有折而不撓臨大節而不可奪之風經藝傳  
記周覽博涉瑰奇在前靡所不識當世是以服重器歸

高名州郡交請待以訪斷歷端首則義可行處爪牙而  
威以布察孝廉除郎中洛陽左尉以公事去辟司徒舉  
高第侍御史直道而往用免其任辟大將軍西府表拜  
涼州刺史遷齊相以公事去詔書印綬即家拜上谷太  
守遷漢陽太守徵拜議郎司徒長史鉅鹿太守被詔書  
爲將作大匠爲受罰者所章拜議郎即徵拜度遼將軍  
遷河南尹少府大鴻臚遂陟司空司徒託痾遜位起家  
拜尚書令以疾篤稱拜光祿大夫後拜太尉久病自替  
復爲少府太中大夫春秋七十五光和七年五月甲寅

慶公性質直不憚強禦在憲臺則有盡規之忠領州郡  
則有虎眈之威其拔賢如旋流討惡如霆擊每所臨向  
清風先翔遠近豫震茲可謂超越衆庶彰於遠邇者已  
於是故吏司徒博陵崔烈廷尉河南吳整等以爲至德  
在已揚之由人苟不皦述夫何考焉乃其勒嘉石永昭  
芳烈遂作頌曰赫矣橋父秉文握武內爲宗翰出爲蕃  
輔在憲彈枉竟由厥矩允牧于涼州彼裔土爰將度遼  
亦用齊斧敷教四畿旋統京宇敦茲五服衆庶是與膺  
踐七命翼我哲聖登空補衮陟徒訓敬尹尉清宸熙帝



之政終始爲貞典章以定遺愛在民皇哀其命立石刊  
銘莫道斯聽魂而有靈萬億其盛

東鼎銘

維建寧二年秋八月丁丑延公于玉堂前廷乃詔曰其  
以大鴻臚橋玄爲司空再拜稽首以讓帝曰俞往三讓  
然後受命公乃虔恭夙夜帝采勤施八方勞作穆穆以  
對揚天子丕顯休命越在先民毗於天子罔不著其股  
肱畢其思心式率天行式昭德音公亦克紹厥猷鑒于  
法罔敢不法憲于誠罔敢不誠用總是群后保乂帝家  
勛在方冊民咸曰休哉惟帝念功越若來二月丁丑遷  
於司徒

中鼎銘

維建寧四年二月丁丑延公登于玉堂前廷乃制詔曰  
其以司空橋玄爲司徒公拜稽首以讓帝曰俞往三讓  
然後受命公允迪厥德宣力肆勤戰戰兢兢以役帝事  
率夫百辟媚于天子天子曰都慎厥身修思永同寅協  
恭以和天衷德則昭之遠則塞之回乃不敢不弼枉乃  
不敢不匡股肱之事旣克三事之繇允備災菁作見乃

引其責曰凡庶微不若彝倫不叙是惟臣之職祇以疾  
告表越十月庚午記此

西鼎銘

維光和元年冬十二月丁巳延公入崇德殿前乃制詔  
曰其以光祿大夫玄爲太尉公拜稽首曰臣聞之三讓  
莫或克從臣不敢辭臣犬馬齒七十可以生可以死其  
戮力閑私悉心在公以盡爲臣之節于時侍從陛階與  
聞公之昌言者莫不惕厲如履薄冰旣乃碑表百代

黃鉞銘

孝桓之季年鮮卑入塞盜起匈奴左部梁州叛羗逼迫  
兵誅淫衍東夷高句麗鬪子百固逆謀並發三垂騷然  
爲國憂念西府表橋公昔在涼州柔遠能適不煩軍師  
而車師克定及在上谷漢陽連在營郡督力方剛明集  
士衆徵拜度遼將軍始受旄鉞鉦鼓之任扞禦三垂公  
以吏士頻年極外勤於奔命人馬疲羸撓鈍請且息州  
營橫發之役以補困憊朝廷許之於是儲廩豐饒奉使  
不懸人逸馬畜弓勁矢利而經用省息官有餘資執事  
無放散之尤簿書有進入之羸治兵示威戎士踊躍旌



旗耀日金鼓震奮守有山岳之固攻有必克之勢羗戎  
授首于西疆百固水散于東鄰鮮卑收迹烽燧不舉眎  
事三年馬不帶缺弓不受彊是用鏤石作茲鉦鉞軍鼓  
陳之東階以昭公文武之勛焉銘曰帝命將軍秉茲黃  
鉞威靈振耀如火之烈公之在位群狄斯柔齊斧罔設  
人士斯休

漢太尉楊公碑

公諱賜字伯獻弘農華陰人姬姓之國有楊侯者公其  
後也其在漢室赤泉侯佐高丞相翼宣咸以盛德光于

前朝祖司徒考太尉繼跡宰司咸有勛烈公承家崇軌  
受天醇素欽承奉構閑于伐柯烈風維變不易其趣文  
藝典籍尋道入奧操清行朗潛晦幽閒不荅州郡之命  
辟大將軍府不得已而應之遷陳倉令公乃因是行退  
居廬公車特徵以病辭司空舉高第拜侍中越騎校尉  
帝篤先業將問故訓公以群公之舉進授尚書于禁中  
遷少府光祿勳敬揆百事莫不時序庶尹知恤閭閻推  
清列作司空地平天成陰陽不忒公遂身避託疾告退  
又以光祿大夫受命司徒敬敷五品宣洽人倫燮和化

理股肱耳目之任靡不克明及至太尉四時順動三光  
耀潤群生豐遠太和交薄三作六卿五蹈三階受爵開  
國應位特進非盛德休功假于天人孰能該備寵榮兼  
包令錫如公之至者乎公體資明哲長於知見凡所辟  
選升諸帝朝者莫非瑰才逸秀并參儲佐惟我下流二  
三小臣穢損清風愧于前人乃糾合同僚各所審紀公  
勲績刊石立銘以慰永懷銘曰天降純嘏篤生柔嘉俾  
胤祖考光輔國家三葉在服帝載用和粵暨我公允執  
不貞在棟伊隆于鼎斯寧德被宇宙華夏以清受茲介  
福履祚孔成爲邑河渭交冕紱珽以佐天子祗事三靈  
丕顯伊德萬邦作程爰銘爰贊式昭懿聲

文烈侯楊公碑

公諱賜字伯獻兼通五典周覽篇籍以爲尚書帝王之  
要政有國之大本也是以三葉相承研其精義五代之  
微言王政之約綱罔不尋其端源究其條貫凜乎其見  
聖人之情旨也蓋以蹈騰餘蹤思高游夏初潛山澤授  
誨童冠後生賴以發袪蒙蔽文其材素者不可勝數乃  
由宰府遂作帝臣于時聖幼將入學群公以溫故知新



德宜師保乃以越騎校尉援于光上之內帝坐已北面以納大誨其教人善誘則恟恟焉罔不伸也引情致喻則閭閻焉罔不釋也迄用有成緝熙光明惟帝念功六在九卿三事勛假皇天澤充區域疆土建封申增戶邑人臣之極位兼而有之然處豐益約九命滋恭可謂高朗令終有始有卒者已於是門生大將軍何進等瞻仰洙泗公喪之禮糾合朋徒稽諸典制僉以爲匡弼之功政事之實詔策之文則史臣志其詳若夫道術之美授之方策則是門人二三小子所特貫綜敢竭不才譏錄

所審言于碑乃申頌曰巍巍聖猷匪師不昭士子困蒙匪師不教於皇文父邈哉伊超如玉之固如岳之喬鑽之斯堅仰之彌高示我顯德授我無隱正席傳道承帝之問誨茲一人萬邦作順微微我徒實賴遺訓文武作式元勛旣奮光啓爵土垂統末胤存榮亡哀沒而不泯司空文烈侯楊公碑

曰漢有國師司空文烈侯楊公公惟司徒之孫太尉公之胤子皇祖考以懿德胥及肄勤式建休勳啓洪範公祗服弘業克丕堂構小乃不敢不慎大亦不敢不戒用

罔有擇言失行在於其躬洎在辟舉先志載言罔不攸  
該乃自宰臣以從王事立功不有用辭其祿逮作御史  
允執國憲納于侍中在帝左右爰董武事王師孔閑群  
公以舊德碩儒道通術明宜建師保延入華光侍宴露  
寢敷典誥之精旨達聖王之聰啟帝以機密齊栗常伯  
劇任鮮克知臧以釐其采命公再作少府俾率其屬以  
熙庶績天地作險國家丕承軍門祛禁式遏寇虐命公  
再作光祿亦總其能巖之士不貳心之臣保乂帝家巖  
巖大理惟制民命命公作民尉惟刑之恤旁施四方惟

明折獄蔽罪于憲之中亦惟三禮六樂國之元幹命公  
作太常明德惟馨八音克諧神人以和末世豐年溥天  
率土而衆莫外命公作司空公唯戢之翊明其政時惟  
休哉唯天陰隲下民彝倫所由順序命公作司徒而敬  
敷五教以親百姓父義母慈兄友弟恭子孝時惟休哉  
昭孝於辟雍命公作三老帝躬以祗敬遵有虞於上庠  
茫茫大運垂光烈曜命公作太尉璇璣運周七精循軌  
時惟休哉帝欲宣力于四方公則翼之辟道或違公則  
弼之虔恭夙夜不敢荒寧用對揚天子丕顯休命天子



大簡其勲用授爵賜封侯于臨晉功成化洽景命有傾  
帝乃震慟執書以泣命于左中郎將郭儀作策賜公驃  
騎將軍臨晉侯印綬兼號特進謚以文烈寵命畢備而  
後即世肆其孤彪敢儀古式昭銘景烈銘曰天鑒有漢  
誕生元輔世作三事勛在王府乃及伊公克光前矩悉  
心畢力胤其祖武化洽群心澤漫綿宇帝曰文烈朕嘉  
君功爲邑河渭建茲土封申備九錫以祚其庸位此特  
進于異群公昔在申呂匡佐周宣崧高作頌大雅揚言  
今我文烈帝載用熙參光日月比功四時身歿名存未

世慕思

太傅文恭侯胡公碑

公諱廣字伯始交趾都尉之元子也公應天淑靈履性  
貞固九德咸修百行畢備遭家不造童而夙孤上奉繼  
親下慈弱弟崎嶇儉約之中以盡孝友之道及至入學  
從訓歷觀古今生而知之聞一覩十兼以周覽六經博  
總群議旁貫憲法通識國典年二十七察孝廉除郎中  
尚書侍郎尚書左丞尚書僕射幹練機事綱繆樞極忠  
亮唯允簡于帝心智略周密冠于庶事遷濟陰太守其

爲政也寬裕足以容衆和柔足以安物剛毅足以威暴  
體仁足以勸俗故禁不用刑勸不用賞其下望之如日  
月從之如影響思不可忘度不可革遺愛結於人心超  
無窮而垂則徵拜大司農遂作司農遷太尉以援立之  
功封安樂鄉侯錄尚書事稱疾屢辭策賜就第復拜司  
空功成身退俾位特進又拜太尉復以特進致命休神  
又拜太尉遜位歸爵旋于舊土徵拜太中大夫尚書令  
太僕太常司徒末康之初以定策元功復封前邑錄尚  
書事疾病就第又授太傅入參機衡五蹈九列七統三

事諒闇之際三據冢宰和神人於宗伯理水土於下台  
訓五品於司徒耀三辰于上階光弼六世歷載三十自  
漢興以來鼎臣元輔耄耋老成勲被萬方與祿終始未  
有若公者焉春秋八十二建寧五年三月壬戌薨于位  
天子悼惜群后傷懷詔五官中郎將任崇奉冊贈以太  
傅安樂鄉侯印綬拜室家子一人郎中賜東園秘器賜  
絲帛含歛之備中謁者董詡弔祠護喪錢布賻賜率禮  
有加賜謚曰文恭昭顯行迹四月丁酉葬于洛陽塋故  
吏濟陰池喜感公之義率慕黃鳥之哀推尋雅意彷徨



舊土休績丕烈宜宣于此乃樹石作頌用揚德音詞曰  
於皇上德懿鑠孔純六孝昭備思順履信濟期命世保  
茲舊門淵泉休茂彪炳其文爰贊天機翼翼唯恭夙夜  
出納紹跡虞龍賦政于外裨化玄通普被汝南越用熙  
雍帝曰休哉命公三事乃耀柔嘉式是自司股肱元首  
庶績咸治二氣燮雍五微來備勲格皇天澤洽后土封  
建南藩受茲介祐玉藻在冕毳服艾輔輅車雕駟四牡  
脩扈贊事上帝祇祀宗祖陟降盈虧與時消息旣明且  
哲保身遺則同軌旦奭光充區域生榮死哀流統罔極

### 太傅胡公碑

維漢二十有一世建寧五年春三月旣生魄八日壬戌  
太傅安樂鄉侯胡公薨越若來四月辛酉葬我君文恭  
侯於是掾太原王允鴈門畢整屬扶風曾宙潁州殷歷  
等僉謂公之德也柔而不犯威而不猛文而不華實而  
不朴靜而不滯動而不躁總天地之中和覽生民之上  
操聰明膚敏兼質先覺涉觀憲法契濶文學睹臯陶之  
闡闡探孔子之房奧然而約之以禮守之以恭寬之以  
納衆汎愛多容其誘人也恂恂焉怡怡焉能使蒙惑開

析僞戾優順逸情勤信及其創基發跡機密聖朝其知其能夙夜惟寅以允帝命是以頻繁機極三升而不出焉乃還譚其舊章彌綸古訓貫萬品研精微用補前臣之所闕十年而無愆迨記同乎富平周慎過於博士偶山甫乎喉舌足虞龍而納言唯帝命公以二郡其爲政也導人以德帥物以已敦以忠肅勵以知耻人悅其化夫樂其和士相勉於公朝民勸行於私家徽纏繫而靡係鞭朴棄而無加洋洋乎若德宣治嚴以爲威寬以爲福而已哉五作卿士七蹈相位太僕司農太傅司司空

一司徒特進各二太常太尉各三光輔六世歷載三  
有餘其致治也通水泉於潤下蕃后土於稼穡訓五品於群黎參人物於區域耀三辰於渾元協大中於皇極傳聖德於幼冲率日奠於舊職譬彼四時功成則退在盈思中升隆以順建封域於南土踐殊號於特進榮祚純業垂乎來胤公自二郡及登相位凡所辟用遂至大位者故司徒中山祝括其餘登堂閣據賦政策勲樹功流化者蓋不可勝載唯我末臣頑蔽無聞仰慕群賢惡乎可及自公寢疾至于薨斃參與嘗禱列在喪位雖庶



物戮刀不愆于禮進睹墳塋几筵靈設退顧堂廡音儀  
未闕感悼傷懷心肝若割相與累次德行撰舉功勳刊  
之于碑用慰哀思其詞曰煥文德伊朝后應期運作漢  
輔喜中興膏民庶澤洪淳亶攸序巨地區充天宇麟高  
逵踵遐武揚景烈垂不朽仰邃古耀昆後

胡公碑銘

公諱廣字伯始南郡華容人也其先自媯姓建國南土  
曰胡子春秋書焉列于諸侯公其後也考以德行純懿  
官至交趾都尉公寬裕仁愛覆載博大研道知幾窮理

盡性凡聖哲之遺教文武之未墜罔有不綜年二十七

察孝廉除郎中尚書侍郎左丞尚書僕射內正機衡  
釐其職文敏暢乎庶事密靜周乎樞機帝用嘉之遷濟  
陰太守公乃布愷悌宣柔嘉通神化導靈和揚惠風以  
養真激清流以盪邪取忠肅於不言消奸究於爪牙是  
以君子勤禮小人知耻鞠推息於官曹刑戮廢於朝市  
餘貨委於路衢餘種棲于畝畝遷汝南太守增修前業  
考績既明入作司農實掌金穀之淵數和均關石王府  
以充遂作司徒昭敷五教進作太尉宣暢渾元人倫輯

睦日月重光遭國不造帝祚無主援立孝桓以紹宗緒  
用首謀定策封安樂鄉侯戶邑之數加千羣公入錄機  
事聽納總已致位就第復拜司空敷土導川俾順其性  
功遂身退告疾固辭乃爲特進爰以休息又拜太常典  
司三禮敬恭禋祀神明嘉歆永世豐年聿懷多福復拜  
太尉尋申前榮又以特進逍遙致位又拜太常遘疾不  
夷遜位歸爵遷於舊都徵拜太中大夫延和末年聖主  
革正幸臣誅斃引公爲尚書命以二千石居官委以閫  
外之事釐改度量以新國家弘綱既整袞闕以補乃拜

太僕車正馬閑六駟言馴遷太常司徒質帝晏駕推建  
聖嗣復封故邑與參機密寢疾告退復拜太傅錄尚書  
事于時春秋高矣繼親在堂朝夕定省不違子道旁無  
几杖言不稱老居喪致哀率禮不越其接下荅賓雖幼  
賤降等禮從謙厚尊而彌恭勞思萬機身勤心苦雖老  
萊子嬰兒其服方叔克壯其猷公旦納于台屋正考父  
俯而循禮曷以尚茲夫蒸蒸至孝德本也體和履忠行  
極也博聞周覽上通也勤勞王家茂功也用能十登三  
事篤受介祉亮皇業於六王嘉丕績於九有窮生人之



光寵享黃耆之遐紀蹈明德以保身與福祿平終始年  
八十有二建寧五年春壬戌薨于位天子悼痛贈策賜  
誄謚曰文恭如前傳之儀而有加焉禮也故吏司徒許  
詡等相與欽慕松高蒸民之作取言時計功之則論集  
行跡銘諸琬琰其詞曰伊漢元輔時惟文恭聰明啟哲  
思心瘁容畢力天機帝休其庸賦政于外有邈其蹤進  
作卿士粵登上公百揆時序五典克從萬邦黎獻共唯  
時雍勲烈所建爵土乃封七被三事再作特進弘唯幼  
冲作傳以訓赫赫猗公邦家之鎮澤被華夏遺愛不倫  
日與月與齊光並運存榮亡顯沒而不泯

胡太傅祠前銘

天鑒有漢山岳降靈於肅文恭應期誕生好是懿德柔  
惠且貞爰在初服皇嘉其聲納于機密機密惟清守于  
三邦三邦事寧越尹三卿百揆時序七受帝命作此元  
輔左右六世靖綏土宇蠢彼群生保賴實叙紹跡龍夷  
繼軌山甫遭國不造仍世短祚援立聖嗣得公之謨帝  
曰文恭朕嘉君功爲邑安樂以祐其庸登位特進于異  
群公休命丕顯光寵克章公拜稽首是對是揚藹藹惟

公民斯攸望春秋既暮倏爾乃喪不憇是遺俾屏於皇  
新廟奕奕于以蒸嘗子子孫孫承嗣無疆

胡廣黃瓊頌

巖巖山岳配天作輔降神有周生由及甫允茲漢室誕  
育二后曰胡曰黃方軌齊武惟道之淵惟德之藪股肱  
元首代作心膂天生蒸人有則有類我胡我黃鍾厥純  
懿巍巍特進仍踐其位赫赫三事七佩其綬奕奕四牡  
沃若六轡袞職龍章其文有蔚參曜乾台窮寵極貴功  
加八荒群生以遂超哉邈乎莫與爲二

司空楊公碑

公諱秉字叔節弘農華陰人其先蓋周武王之穆晉唐  
叔之后也末葉以支子食邑于楊因氏焉周室旣微裔  
胄無緒暨漢興烈祖楊喜佐命征伐封赤泉侯嗣子業  
綬冕相繼公之不考以忠蹇亮弼輔孝安登司徒太尉  
公承風緒世篤儒教以歐陽尚書京氏易誨授四方學  
者自遠而至蓋踰三千初辟司空舉高第拜侍御史遷  
豫州兗州刺史任城相徵入勸講拜太中大夫左中郎  
將尚書出補右扶風留拜光祿大夫遭權孽貴盛六年



守靜外戚火燔乃遷太僕太卿公事絀位浹辰之間俾  
位河南憤疾豪強見違姦黨用嬰疾廢起家復拜太常  
遂陟三司沙汰虛冗料簡貞實抽援表達與之同蘭芳  
任鼎重從駕南巡爲朝碩德然知權過於寵私富侔國  
大臣苛察望變復還條表以聞啓導上怒其時所免州  
牧郡守五十餘人饗戾是黜英才是列善否有章京夏  
清肅在位七載年七十有四延熹八年五月丙戌薨朝  
廷惜焉寵賜有加公自奉嚴勅動遵禮度量材授任當  
官而行不爲義絀疾是苛政益固其守尉無宿肉器不

鏤雕夙喪嬪儷妾不嬖御可謂立身無過之地正直清  
儉該備者矣昔仲尼嘗垂三戒而公免焉故能匡朝盡  
直獻可去奸忠侔前後聲塞宇宙非黃中純白窮達一  
致其惡能立功立事敷聞于下昭升于上若茲巍巍者  
乎於是門人學徒相與刊石樹碑表勒鴻勳讚懿德傳  
億年於戲公唯岳靈天挺德翼至神氣綢緼仁哲生應  
台任作邦禎帝欽亮訪典刑道不惑迄有成光遐邇穆  
其清

司空臨晉侯楊公碑

皇帝遣中謁者陳遂侍御史馬助持節送柩陳遵桓典  
蘭臺令史十人將羽林騎鉦車介士前後鼓吹以驃騎  
將軍官屬及司空法駕與公卿尚書三臺以下葬我文  
烈侯三年九月甲申小祥會如初四年九月戊申大祥  
公卿尚書三臺以下會如小祥之禮公之祖納忠於前  
朝以罹艱禍父隱約蟄瘁治家師導唯儉之尚公生值  
歎編資賄屢空手執勤役遠涉道里以脩經術險阻艱  
難曷所不嘗特以其靜則貞一審固動則不違則度含  
容弱我無競伊人謀無不忠言無不信自在弱冠布衣

之中固已流芳名著茂實公孫同倫莫能齊焉者矣州  
郡禮招莫之能屈委百里位辟公車令自侍御史侍中  
已往道爲帝師德爲世表體尊名重階級彌崇而公處  
以恭遜行以固慎德大而心小居高而志降夫驕吝之  
釁周公其猶病諸而公脫然以爲行首不亦泰乎及其  
所以匡輔本朝忠言嘉謀造膝危辭當事而行言從計  
納亦不敢宣密誠潛功貽于帝躬家無遺草論者不見  
嗟乎誠爲達事君之體得人臣之上儀者已公素不貴  
歸非不樂引美故雖彷彿猶不敢載以順公之雅初受



封自以功不副賞前後固辭章凡十上憂愴悄悄形于  
容色雖不克從情旨昭顯晚節爲廷尉公曰昔在三后  
成功惟殷于民而臯陶不與焉蓋吝之也及爲特進又  
曰唯漢重臣中興以來克稱斯位者其唯高密元侯乎  
吾何德以堪諸寢疾顧命無辭要言約戒忠儉而已孤  
彪銜恤求思綴輯所履以贊銘之銘曰赫赫烈侯卓爾  
超倫於唯楊公乃華降神故能明哲德亞聖人受茲介  
福位極人臣包羅五典本道根真爲國之師誨上經文  
類歷鄉校五登鼎鉉建名著忠確越前賢攘災興化蠱  
蠶不臻風雨以時屢獲有年三葉宰相應祚于天臨晉  
是侯子子孫孫億兆不窮如山之堅四時絜祀以承所  
尊祀事孔明奉亡如存馥馥芬芬用慰顯魂

漢蔡中郎集卷之五終

漢蔡中郎集卷之六

商氏伯子家藏

明校尉喬世寧景叔無錫俞憲汝成校訂任

城楊賢子庸梓行

太尉汝南李公碑

公諱咸字元卓汝南西平人蓋秦將李信之後孝武大將軍廣之曾也枝流葉布家于茲土文武繼踵世為著姓曾祖父江夏太守伯父東郡太守公受純懿之資萃忠清之節夙夜嚴慄孝配大舜敦詩書而悅禮樂觀天文而察地理動與神合彗抗流行操邁伯夷德追孔父